

简体字本二十六史

元史



吉林人民出版社

元史

卷七六——卷一一〇

〔明〕

宋濂等撰
余大钧标点

元史卷七六

志第二七

祭祀五

太社太稷 先农 宣圣 岳镇海渎
郡县社稷 郡县宣圣庙
郡县三皇庙 岳镇海渎常祀
风雨雷师 武成王 古帝王庙
周公庙 名山大川忠臣义士之祠
功臣祠 大臣家庙

至元七年十二月，有诏岁祀太社太稷。三十年正月，始用御史中丞崔彧言，于和义门内少南，得地四十亩，为壝垣，近南为二坛，坛高五丈，方广如之。社东稷西，相去约五丈。社坛土用青赤白黑四色，依方位筑之，中间实以常土，上以黄土覆之。筑必坚实，依方面以五色泥饰之。四面当中，各设一陛道。其广一丈，亦各依方色。稷坛一如社坛之制，惟土不用五色，其上四周纯用一色黄土。坛皆北向，立北墉于社坛之北，以砖为之，饰以黄泥；塿坎二于稷坛之北，少西，深足容物。

二坛周围壝垣，以砖为之，高五丈，广三十丈，四隅连饰。内壝垣棂星门四所，外壝垣棂星门二所，每所门三，列戟二十有四。外壝内

北垣下屋七间，南望二坛，以备风雨，曰望祀堂。堂东屋五间，连厦三间，曰齐班厅。厅之南，西向屋八间，曰献官幕。又南，西向屋三间，曰院官斋所。又其南，屋十间，自北而南，曰祠祭局，曰仪鸾库，曰法物库，曰都监库，曰雅乐库。又其南，北向屋三间，曰百官厨。外垣南门西墻垣西南，北向屋三间，曰大乐署。其西，东向屋三间，曰乐工房。又其北，北向屋一间，曰馔幕殿。又北，南向屋三间，曰馔幕。又北稍东，南向门一间。院内南，南向屋三间，曰神厨。东向屋三间，曰酒库。近北少却，东向屋三间，曰牺牲房。并有亭。望祀堂后自西而东，南向屋九间，曰执事斋郎房。自北折而南，西向屋九间，曰监祭执事房。此坛墻次舍之所也。

社主用白石，长五尺，广二尺，剗其上如钟。于社坛近南，北向，埋其半于土中。稷不用主。后土氏配社，后稷氏配稷。神位版二，用栗，素质黑书。社树以松，于社稷二坛之南各一株。此作主树木之法也。

祝版四，以楸木为之，各长二尺四寸，阔一尺二寸，厚一分。文曰：“维年月日，嗣天子敬遣某官某，敢昭告于太社之神。”配位曰后土之神。稷曰太稷之神，配位曰后稷之神。玉币，社稷皆黝圭一，繅藉，瘗玉一，以黝石代之，玄币一。配位皆玄币一，各长一丈八尺。此祝文玉币之式也。

牛一，其色黝，其角握，有副。羊四，野豕四。笾之实皆十，无糗饵、粉粢。豆之实亦十，无餚食、糁食。簠簋之实皆四，铏之实和羹五，齐皆以尚醕代之。香用沉龙涎。神席一，缘以黑綾，黑綾褥方七尺四寸。太尊、著尊、牺尊、山罍各二，有坫，加勺幂。象尊、壺尊、山罍各二，有坫幂，设而不酌。笾豆各十有一，其一设于馔幕。铏三，簠三，簋三，其一设于馔幕。俎八，其三设于馔幕。盘一，毛血豆一，爵一，有坫。沙池一，玉币筐一，木柂一，勺一，香鼎一，香盒一，香案一，祝案一，皆有衣。红髹器一，以盛马湩。盥洗位二，罍二，洗二。白罗巾四，实以筐。朱漆盘五。已上，社稷皆同。配位有象尊，无太尊。设而不酌者，无象尊，馀皆与正位同。此牲齐祭器之等也。

饌幕、省饌殿、香殿，黃羅幕三，黃羅額四，黃絹帷一百九十五幅，獻攝版位三十有五，紫綾拜褥百，蒲、苇席各二百，木燈籠四十，絳羅燈衣百一十，紅挑燈十，剪燭刀二，鐵釁盆三十有架，黃燭二百，雜用燭二百，麻釁三百，松明、清油各百斤。此饌幕版位燭燎之用也。

初獻官一，亞獻官一，終獻官一，攝司徒一，助奠官二，太常卿一，光祿卿一，廩牺令一，太官令一，巾篚官四，祝史四，監祭御史二，監禮博士二，司天監二，良酝令一，奉爵官一，司尊罍二，盥洗官二，爵洗官二，太社令一，太社丞一，太樂令一，太樂丞一，協律郎二，奉禮郎二，读祝官一，舉祝官二，奉幣官四，剪燭官二，太祝七，齋郎四十有八，贊者一，禮直官三，與祭官無定員。此獻攝執事之人也。

凡祭之日，以春秋二仲月上戊。延佑六年改用中戊。其儀注之節有六：

一曰迎香。前一日，有司告諭坊市，洒扫經行衢路，設香案。至日質明，有司具香酒樓輦，三獻官以下及諸執事官各具公服，五品以下官、齋郎等皆借紫，詣崇天門。三獻官及太常礼仪院官入，奉祝及御香、尚尊酒、馬漚自內出。監祭御史、監禮博士、奉禮郎、太祝分左右兩班前導。控鶴五人，一人執傘，四人執仗，由大明門正門出。教坊大樂作。至崇天門外，奉香、酒、馬漚者各安置于輿，導引如儀。至紅門外，百官乘馬分班行于仗之外，清道官行于仗衛之先，兵马司巡兵夾道次之，金鼓又次之，京尹仪从左右成列又次之，教坊大樂一隊次之。控鶴弩手各服其服，執仗左右成列次之。拱衛使行其中，儀鳳司細樂又次之。太常卿與博士、御史導于輿前，獻官、司徒、助奠官從于輿後。若駕幸上都，三獻官以下及諸執事官則詣健德門外，皆具公服于香輿前北向立，異位重行。俟奉香酒官驛至，太常官受而奉之，各置于輿。禮直官贊：班齊，鞠躬，再拜興，平立。班首稍前摺笏跪，眾官皆跪，三上香，出笏就拜興，平立退復位，北向立，鞠躬，再拜興，平立。眾官上馬，分班前導如儀。至社稷坛

北神门外皆下马，分左右入自北门，序立如仪。太常卿、博士、御史前导，献官、司徒、助奠等官后从。至望祀堂下，三献奉香、酒、马潼升阶，置于堂中黄罗幕下。礼直官引三献官以次而出，各诣斋次，释服。

二曰斋戒。前期三日质明，有司设三献官以下行事执事官位于中书省。太尉南向，监祭御史位二于其西，东向，监礼博士位二于其东，西向，俱北上。司徒、亚献、终献位于其南，北向。次助奠，稍却。次太常卿、光禄卿、太官令、司尊彝、良酝令、太社令、廪牺令、光禄丞、太乐令、太社丞。次读祝官、奉爵官、太祝、祝史、奉礼郎、协律郎、司天生、诸执事斋郎。每等异位重行，俱北向，西上。赞者引行事执事官各就位，立定。礼直官引太尉、初献就位，读誓曰：某年某月某日上戊日，祭于太社太稷，各扬其职，其或不敬，国有常刑。散斋二日，宿于正寝，致斋一日于祠所。散斋日治事如故，不吊丧问疾，不作乐，不判署刑杀文字，不决罚罪人，不与秽恶事。致斋日，惟祭事得行，其馀悉禁。凡与祭之官已斋而阙者，通摄行事。七品以下官先退，馀官对拜。守壇门兵卫与大乐工人，俱清斋一日。行礼官，前期习仪于祠所。

三曰陈设。前其三日，所司设三献官以下行事执事官次于斋房之内，又设馔幕四于西神门之外，稍南，西向，北上。今有馔幕殿在西壇门外，近北，南向。陈设如仪。前祭二日，所司设兵卫，各以其方色器服守卫壇门，每门二人，每隅一人。太乐令帅其属设登歌之乐于两坛上，稍北，南向。磬簾在东，钟簾在西，柷一在钟簾南稍东，敔一在磬簾南稍西。搏拊二，一在柷南，一在敔南，东西相向。歌工次之，馀工位在县后。其匏竹者位于坛下，重行南向，相对为首。太社令帅其属扫除坛之上下，为瘞坎二于壬地，方深足以容物，南出陞。前祭一日，司天监、太社令帅其属升，设太社、太稷神座各于坛上，近南，北向。设后土神座于太社神座之左，后稷神座于太稷神座之左，俱东向。席皆以莞，裯褥如币之色，设神位版各于座首。奉礼郎设三献官位于西神门之内道南，亚献、终献位稍却。司徒位道北，太

常卿、光禄卿次之，稍却。司天监、光禄丞又次之。太社令、太官令、良酝令、廩牺令、太社丞、读祝官、奉爵官、太祝以次位于其北，诸执事者及祝史、斋郎位于其后。每等异位重行，俱东向，南上。又设监祭御史位二，监礼博士位二，于太社坛子陛之东北，俱西向，南上。设奉礼郎位于稷坛之西北隅，赞者位于北稍却，俱东向。协律郎位二，于各坛下乐簾东北，俱西向。太乐令位于两坛乐簾之间南向，司尊彝位于酌尊所，俱南向。设望瘗位于坎之南，北向。又设牲榜于西神门外，东向。诸太祝位于牲西，祝史次之，东向。太常卿、光禄卿、太官令位在南，北向东上。监祭、监礼位于太常卿之东稍却，俱北向，东上。廩牺令位于牲东北，南向。又设礼饌于牲东，设省饌于礼饌之北，今有省饌殿设位于其北，东西相向，南上。太常卿、光禄卿、太官令位于西，东向，监祭、监礼位于东，西向，俱南上。礼部设版案各于神位之侧，司尊彝、奉礼郎帅执事者设玉币筐于酌尊所。次设笾豆之位，每位各笾十、豆十、簠二、簋二、铏三、俎五、盘一。又各设笾一、豆一、簠一、簋一、俎三于饌幕内。毛血别置一豆。设尊罍之位，社稷正位各太尊二、著尊二、牺尊二、山罍二于坛上酉陛之西北隅，南向，东上。设配位各著尊二、牺尊二、象尊二、山罍二，在正位酒尊之西，俱南向，东上。又设正位各象尊二、壶尊二、山罍二，于坛下子陛之东，南向，东上。配位各壶尊二、山罍二，在卯陛之南，西向，南上。又设洗位二，于各坛子陛之西北，南向。筐在洗东北肆，执罍筐者各位于其后。

祭日丑前五刻，司天监、太社令各服其服，帅其属升，设正配位神位版于坛上。又陈玉币，正位礼神之玉一，两圭有邸，置于匣。正配位币皆以玄，各长一丈八尺，陈于筐。太祝取瘗玉加于币，实于筐，瘗玉以玉石为之，及礼神之玉各置于神座前。光禄卿帅其属，入实笾豆簠簋。每位笾三行，以右为上。第一行，乾糇在前，乾枣、形盐、鱼脯次之。第二行，鹿脯在前，榛实、乾桃次之。第三行，菱在前，芡、栗次之。豆三行，以左为上。第一行，芹菹在前，荀菹、葵菹、菁次之。第二行，韭菹在前，鱼醢、兔醢次之。第三行，豚拍在前，鹿臛

醯醢次之。簠实以稻粱，簋实以黍稷，铏实以羹。良酝令帅其属，入实尊罍。正位太尊为上，实以泛齐，著尊实以醴齐，牺尊实以盎齐，象尊实以粱齐，壺尊实以沈齐，山罍实以三酒。配位著尊为上，实以泛齐，牺尊实以醴齐，象尊实以盎齐，壺尊实以醍齐，山罍实以三酒。凡齐之上尊实以明水，酒之上尊实以玄酒，酒齐皆以尚酝代之。太常卿设烛于神座前。

四曰省牲器。前期一日午后八刻，诸卫之属禁止行人。未后二刻，太社令帅其属，扫除坛之上下。司尊彝、奉礼郎帅执事者，以祭器入设于位。司天监、太社令升，设神位版及礼神之玉币如仪。俟告洁毕，权彻，祭日重设。未后二刻，廪牺令与诸太祝、祝史以牲就位，礼直官、赞者分引太常卿、监祭、监礼、太官令于西神门外省牲位，立定。礼直官引太常卿，赞者引监祭、监礼，入自西神门，诣太社坛，自西陛升，视涤濯于上，执事者皆举幕曰洁。次诣太稷坛，如太社之仪讫，降复位。礼直官稍前曰告洁毕，请省牲，引太常卿稍前省牲讫，退复位。次引廪牺令出班巡牲一匝，东向折身曰“充”，复位。诸太祝俱巡牲一匝，上一员出班东向折身曰“腯”，复位。礼直官稍前曰省牲毕，请就省馔位，引太常卿以下各就位，立定。省馔毕，还斋所。廪牺令与太祝、祝史以次牵牲诣厨，授太官令。次引光禄卿以下诣厨省鼎戕，视涤溉毕，乃还斋所。晡后一刻，太官令帅宰人以弯刀割牲，祝史以豆取毛血各置于馔幕。祝史又取瘞血贮于盘，遂烹牲。

五曰奠玉币。祭日丑前五刻，三献官以下行事执事官，各服其服。有司设神位版，陈玉币，实笾豆簠簋尊罍。俟监祭监礼按视坛之上下，及彻去盖幕。未明二刻，太乐令帅工人入，奉礼郎、赞者入就位。礼直官、赞者分引监祭、监礼、诸太祝、祝史、斋郎及诸执事官，自西神门南偏门入，当太社坛北墉下，重行南向立，以东为上。奉礼曰再拜，赞者承传，监祭、监礼以下皆再拜。次赞者分引各就坛上下位，祝史奉盘血，太祝奉玉币，由西阶升坛，各于尊所立。次引监祭、监礼按视坛之上下，纠察不如仪者，退复位。质明，礼直官、赞

者各引三献以下行礼执事官入就位，皆由西神门南偏门以入。礼直官进初献之左，曰“有司谨具，请行事”，退复位。协律郎跪，俯伏，举麾兴，工鼓柷，乐作八成，偃麾，戛敔乐止。礼直官引太常卿奠血于坎讫，复位，祝史以盘还饌幕，以俟奉毛血豆。奉礼曰众官再拜，在位者皆再拜。又赞诸执事者各就位，礼直官、赞者分引执事官各就坛上下位。诸太祝各取玉币于长筐，立于尊所。礼直官引初献诣太社坛盥洗位，乐作，至位南向立，乐止。搢笏，盥手，帨手，执笏诣坛，乐作，升自北陛，至坛上，乐止。诣太社神座前，南向立，乐作，搢笏跪。太祝加玉于币，东向跪以授初献，初献受玉币奠讫，执笏俯伏兴，少退，再拜讫，乐止。礼直官引初献降自北陛，诣太稷坛盥洗位，乐作，至位乐止。盥洗讫，升坛奠玉币，并如太社后土之仪。奠毕，降自北陛，乐作，复位乐止。初献尊玉币将毕，祝史各奉毛血豆立于西神门外，俟奠玉币毕，乐止。祝史奉正位毛血入自中门，配位毛血入自偏门。至坛下，正位者升自北陛，配位者升自西陛，诸太祝迎取于坛上，各进奠于神位前，太祝、祝史俱退立于尊所。

六曰进熟。初献既奠玉币，有司先陈鼎八于神厨，各在于镬右。太官令出，帅进饌者诣厨，以匕升羊豕于镬，各实于一鼎，幕之。祝史以局对举鼎，有司执匕以从，各陈于饌幕内。俟光禄卿出，帅其属实笾豆簠簋讫，乃去鼎之肩幕，匕加于鼎。太官令以匕升羊豕，各载于俎，俟初献还位，乐止。礼直官引司徒出诣饌所，帅进饌者各奉正配位之饌，太官令引以次自西神门入。正位之饌入自中门，配位之饌入自偏门。饌初入门，乐作，饌至陛，乐止。祝史俱进，彻毛血豆，降自西陛以出。正位之饌升自北陛，配位之饌升自西陛，诸太祝迎取于坛上，各跪奠于神座前讫，俯伏兴。礼直官引司徒、太官令及进饌者，自西陛各复位。诸太祝还奠所，赞者曰“太祝立茅苴于沙池”。礼直官引初献官诣太社坛盥洗位，乐作，至位南向立，乐止。搢笏，盥手，帨手，执笏诣爵洗位，至位南向立，搢笏，洗爵、拭爵，以爵授执事者，执笏诣坛，乐作，升自北陛，至坛上，乐止。诣太社酌尊所，东向立，执事者以爵授初献，初献搢笏执爵，司尊者举幕，良酝令跪

酌太尊之泛齐，乐作。初献以爵授执事者，执笏诣太社神座前，南向立，搢笏跪。执事者以爵授初献，初献执爵三祭酒，奠爵，执笏俯伏兴，少退立，乐止。举祝官跪，对举祝版。读祝官西向跪，读祝文。读讫，俯伏兴，举祝官奠祝版于案，兴。初献再拜讫，乐止。次诣后土氏酌尊所，东向立。执事者以爵授初献，初献搢笏执爵，司尊彝举幕，良酝令跪酌著尊之泛齐，乐作。初献以爵授执事者，执笏旨后土神座前，西向立，搢笏跪。执事者以爵授初献，初献执爵三祭酒，奠爵讫，执笏俯伏兴，少退立，乐止。举祝官跪，对举祝版。读祝官南向跪，读祝文。读讫，俯伏兴，举祝官奠祝版于案，兴。初献再拜讫，乐止。降自北陛，诣太稷坛盥洗位，乐作，至位，乐止。盥洗升献，并如太社后土之仪。降自北陛，乐作，复位，乐止。读祝、举祝官亦降复位。亚献诣两坛盥洗升献，并如初献之仪。终献盥洗升献，并如亚献之仪。终献奠献毕，降复位，乐止，执事者亦复位。太祝各进彻笾豆，乐作，卒彻，乐止。奉礼曰“赐胙，众官再拜。”赞者承传，在位者皆再拜讫，送神乐作，一成止。礼直官进初献之左，曰请诣望瘗位，御史、博士从，乐作，至位北向立，乐止。初在位官将拜，诸太祝各执篚进于神座前，取瘗玉及币，斋郎以俎载牲体并黍稷爵酒，各由其陛降，置于坎讫，赞者曰可瘗，东西各二人置土半坎。礼直官进初献之左，曰礼毕，礼直官各引献官以次出。礼直官引监祭、太祝以下执事官，俱复于坛北墉下，南向立定。奉礼曰再拜，监祭以下皆再拜讫，出。祝史、斋郎及工人以次出。祝版燔于斋所。光禄卿、监祭、监礼展视酒胙讫，乃退。

其告祭仪，告前三日，三献官以下诸执事官，各具公服，赴中书省受誓戒。告前一日，省牲器。告日质明，三献官以下诸执事各服其服，礼直官引监祭、监礼以下诸执事官入自北墉下，南向立定。奉礼郎赞曰再拜。在位官皆再拜讫，奉礼郎赞曰：各就位，立定。监祭、监礼视陈设毕，复位立定。礼直官引三献、司徒、太常卿、光禄卿入就位，立定。礼直官赞：有司谨具，请行事。降神乐作，八成止。太常卿瘗血，复位立定。奉礼郎赞再拜。皆再拜讫，礼直官引初献官

诣盥洗位，盥手讫，诣社坛正位神座前南，搢笏跪，三上香，奠玉币，执笏俯伏兴。再拜讫，诣配位神座前西向，搢笏跪，三上香，奠币，执笏俯伏兴。再拜讫，诣稷坛盥洗位，盥手讫，升坛，并如上仪。俱毕，降复位。司徒率斋郎进饌，奠讫，降复位。礼直官引初献官诣盥洗位，盥手讫，诣爵洗位，洗爵讫，诣酒尊所酌酒讫，诣社坛神位座前，南向立，搢笏跪，三上香，执爵，三祭酒于茅苴，爵授执事者，执笏俯伏兴。俟读祝官读祝文讫，再拜兴，诣酒尊所酌酒讫，诣配位神座前，西向，搢笏跪，三上香，执爵，三祭酒于茅苴，爵授执事者，执笏俯伏兴。俟读祝文讫，再拜兴，诣稷坛盥洗位，盥手，洗爵，酌献，并如上仪。俱毕，降复位。礼直官引亚献，并如初献之仪，惟不读祝。俱毕，降复位。礼直官引终献，并如亚献之仪。俱毕，降复位。太祝彻笾豆讫，奉礼郎赞赐胙。众官再拜讫，礼直官引三献、司徒、太常卿诣瘞坎位，南向立定。礼直官赞可瘞，礼毕出。礼直官引监祭、监礼太祝、斋郎至北墉下，南向立定。奉礼赞再拜，皆再拜讫，出。

先农之祀，始自至元九年二月，命祭先农如祭社之仪。十四年二月戊辰，祀先农东郊。十五年二月戊午，祀先农，以蒙古胄子代耕籍田。二十一年二月丁亥，又命翰林学士承旨撒里蛮祀先农于籍田。武宗至大三年夏四月。从大司农请，建农、蚕二坛。博士议：二坛之式与社稷同，纵广一十步，高五尺。四出陛，外墻相去二十五步，每方有棂星门；今先农、先蚕坛位在籍田内，若立外墻，恐妨千亩，其外墻勿筑。是岁命祀先农如社稷，礼乐用登歌，日用仲春上丁，后或用上辛或甲日。祝文曰：“维某年月日，皇帝敬遣某官，昭告于帝神农氏。”配神曰“于后稷氏”。

祀前一日未后，礼直官引三献、监祭礼以下省牲饌如常仪。祀日丑前五刻，有司陈灯烛，设祝币，太官令帅其属入实笾豆尊罍。丑正，礼直官引先班入就位，立定，次引监祭礼按视坛之上下，纠察不如仪者。毕，退复位，东向立。奉礼曰再拜。赞者承传再拜讫，奉礼又赞诸执事者各就位。礼直官各引执事官各就位，立定。次引三献

官并与祭等官以次入就位，西向立。礼直官于献官之右，赞请行事，乐作三成止。奉礼赞再拜，在位者皆再拜。太祝跪取币于篚，立于尊所。礼直官引初献官诣盥洗位，北向立，盥手帨手毕，升自东阶，诣神位前北向立，搢笏跪，三上香，受币奠币，执笏俯伏兴，少退，再拜讫，降复位，立定。太官令率斋郎设馔于神位前毕，俯伏兴，退复位。礼直官引初献再诣盥洗位，北向立。盥手、帨手，诣爵洗位，洗爵、拭爵，诣酒尊所酌酒毕，诣正位神位前，北向立。搢笏跪，三上香，三祭酒于沙池，爵授执事者，执笏俯伏兴，北向立。俟读祝毕，再拜兴。次诣配位酒尊所，酌酒讫，诣神位前，东向立。搢笏跪，三上香，三祭酒于沙池，爵授执事者，执笏俯伏兴，东向立。俟读祝毕，再拜，退复位。次引亚终献行礼，并如初献之仪，惟不读祝，退复位，立定。礼直官赞彻笾豆，乐作，卒彻，乐止。奉礼赞赐胙，众官再拜。赞者承传，在位者皆再拜讫，乐作送神之曲，一成止。礼直官引斋郎升自东阶，太祝跪取币祝，斋郎捧俎载牲体及笾、豆、簠、簋，各由其阶至坎位，北向立。俟三献毕，至立定。各跪奠讫，执笏俯伏兴。礼直官赞可瘞。乃瘞。瘞毕，三献以次诣耕地所，耕讫而退。此其仪也。先蚕之祀未闻。

宣圣庙，太祖始置于燕京。至元十年三月，中书省命春秋释奠，执事官各公服如其品，陪位诸儒襕带唐巾行礼。成宗始命建宣圣庙于京师。大德十年秋，庙成。至大元年秋七月，诏加号先圣曰大成至圣文宣王。延佑三年秋七月，诏春秋释奠先圣，以颜子、曾子、子思、孟子配享。封孟子父为邾国公，母为邾国宣献夫人。皇庆二年六月，以许衡从祀，又以先儒周惇颐、程颢、程颐、张载、邵雍、司马光、朱熹、张栻、吕祖谦从祀。至顺元年，以汉儒董仲舒从祀。齐国公叔梁纥加封启圣王，鲁国太夫人颜氏启圣王夫人；颜子，充国复圣公；曾子，郕国宗圣公；子思，沂国述圣公；孟子，邹国亚圣公；河南伯程颢，豫国公；伊阳伯程颐，洛国公。

其祝币之式，祝版三，各一尺二寸，广八寸，木用楸梓柏，文曰：

“维年月日，皇帝敬遣某官等，致祭于大成至圣文宣王。”于先师曰：“维年月日，某官等致祭于某国公。”币三，用绢，各长一丈八尺。

其牲齐器皿之数，牲用牛一、羊五、豕五。以牺尊实泛齐，象尊实醴齐，皆三，有上尊，加幂有勺，设堂上。太尊实泛齐，山罍实醴齐，有上尊。著尊实盍齐，牺尊实醴齐，象尊实沈齐，壶尊实三酒，皆有上尊，设堂下。盥洗位，在阼阶之东。以象尊宝醴齐，有上尊，加幂有勺，设于两庑近北。盥洗位，在阶下近南。笾十，豆十，罍二，簋二，登三，铏三，俎三，有毛血豆，正配位同。笾豆皆二，簋一，簠一，俎一，从祀皆同。凡铜之器六百八十有一，宣和爵坫一，豆二百四十有八，簠簋各一百一十有五，登六，牺尊、象尊各六，山尊二，壶尊六，著尊、太尊各二，罍二，洗二，龙杓二十有七，坫二十有八，爵一百一十有八。竹木之器三百八十有四，笾二百四十有八，篚三，俎百三十有三。陶器三，瓶二，香炉一。笾巾二百四十有八，簠簋巾二百四十有八，俎巾百三十有三，黄巾蒙单十。

某乐用登歌。其日用春秋二仲月上丁，有故改用中丁。

其释尊之仪，省牲前期一日晡时，三献官、监祭官各具公服，诣省牲所阼阶，东西向立，以北为上。少顷，引赞者引三献官、监祭官巡牲一匝，北向立，以西为上。侍礼牲者折身曰“充”，赞者曰“告充”毕，礼牲者又折身曰“腯”，赞者曰“告腯”毕，赞者复引三献官、监祭官诣神厨，视涤溉毕，还斋所，释服。释奠，是日丑前五刻，初献官及两庑分奠官二员，各具公服于幕次，诸执事者具儒服，先于神门外西序东向立，以北为上。明赞、承传赞先诣殿庭前再拜毕，明赞升露阶东南隅西向立，承传赞立于神门阶东南隅西向立。掌仪先引诸执事者各司其事，引赞者引初献官、两庑分奠官点视陈设。引赞者进前曰请点视陈设。至阶，曰升阶，至殿簷下，曰：“诣大成至圣文宣王神位前”，至位，曰：北向立。点视毕，曰：诣兖国公神位前。至位，曰东向立。点视毕，曰：诣邹国公神位前。至位，曰：西向立。点视毕，曰：诣东从祀神位前。至位，曰：东向立。点视毕，曰：诣西从祀神位前。至位，曰：西向立，点视毕，曰：诣酒尊所，曰：西向立。点

视毕，曰：诣三献爵洗位。至阶，曰：降阶，至位，曰：北向立。点视毕，曰：诣三献官盥洗位。至位，曰：北向立。点视毕，曰：请就次。

方初献点视时，引赞二人各引东西庑分奠官曰：请诣东西庑神位前，至位东曰东，西曰西向立。点视毕，曰：诣先儒神位前。至位，曰：南向立。点视毕，曰：退诣酒尊所。至酒尊所，东西向立。点视毕，曰：退诣分奠官爵洗位。至位，曰：南向立。点视毕，曰：请就次。两庑分奠官点视毕，引赞曰：请诣望瘗位。至位，曰：北向立。点视毕，曰：请就次。初献官释公服，司钟者击钟，初献已下各服其服，齐班于幕次。

掌仪点视班齐，诣明赞报知，引礼者引监祭官、监礼官就位。进前曰：请就位。至位，曰：就位，西向立。明赞唱曰：典乐官以乐工进，就位。承传赞曰：典乐官以乐工进，就位。明赞唱曰：诸执事者就位，承传赞曰：诸事者就位。明赞唱曰：诸生就位，承传赞曰：诸生就位，引班者引诸生就位。明赞唱曰：陪位官就位，承传赞曰：陪位官就位，引班者引陪位官就位。明赞唱曰：献官就位，承传赞曰：献官就位，引赞者进前曰：请就位，至位，曰：西向立。明赞唱曰：辟户，俟户辟，迎神之曲九奏。

乐止，明赞唱曰：初献官以下皆再拜，承传赞曰：鞠躬，拜，兴，拜，兴，平身。明赞唱曰：诸执事者各司其事。俟执事者立定，明赞唱曰：初献官奠币。引赞者进前曰：请诣盥洗位。盥洗之乐作，至位，曰：北向立。搢笏，盥手、帨手，出笏，乐止。及阶，曰：升阶。升殿之乐作。乐止，入门，曰：诣大成至圣文宣王神位前。至位，曰：就位，北向立，稍前。奠币之乐作。搢笏跪，三上香，奉币者以币授初献，初献受币奠讫，出笏就拜兴，平身少退，再拜，鞠躬，拜兴，拜兴，平身。曰：诣兖国公神位前。至位，曰：就位，东向立；奠币如上仪。曰：诣邹国公神位前。至位，曰：就位，西向立；奠币如上仪。乐止，曰：退复位。及阶，降殿之乐作。乐止，至位，曰：就位，西向立。

俟立定，明赞唱曰：礼馔官进俎。奉俎之乐作，乃进俎，乐止，进俎毕。明赞唱曰：初献官行礼，引赞者进前曰：请诣盥洗位。盥洗之

乐作，至位，曰：北向立。搢笏，盥手、帨手，出笏。请诣爵洗位，至位，曰：北向立。搢笏，执爵、涤爵、拭爵，以爵授执事者，如是者三，出笏。乐止，曰：请诣酒尊所。及阶，升殿之乐作，曰：升阶。乐止，至酒尊所，曰：西向立。搢笏，执爵举幕，司尊者酌牺牲之醴齐，以爵授执事者，如是者三，出笏。曰：诣大成至圣文宣王神位前。至位，曰：就位，北向立。酌献之乐作，稍前，搢笏跪，三上香，执爵三祭酒，奠爵，出笏，乐止。祝人东向跪读祝，祝在献官之左。读毕兴，先诣左配位，南向立。引赞曰：就拜兴，平身，少退，再拜，鞠躬，拜，兴，拜，兴，平身。曰：诣兖国公神位前。至位曰：就位，东向立，酌献之乐作。乐止，读祝如上仪。曰：诣邹国公神位前，至位，曰：就位，西向立；酌献之乐作。乐止，读祝如上仪。曰：退复位。至阶，降殿之乐作。乐止，至位，曰：就位，西向立。

俟立定，明赞唱曰：亚献官行礼，引赞者进前曰：请诣盥洗位。至位，曰：北向立。搢笏，盥手，出笏。请诣爵洗位，至位，曰：北向立。搢笏，执爵、涤爵、拭爵，以爵授执事者，如是者三，出笏。请诣酒尊所，曰：西向立。搢笏，执爵举幕，司尊者酌象尊之醴齐，以爵授执事者，如是者三，出笏。曰：诣大成至圣文宣王神位前。至位，曰：就拜，北向立。酌献之乐作。稍前，搢笏跪，三上香，执爵三祭酒，奠爵出笏，就拜兴，平身少退，鞠躬，拜兴，拜兴，平身。曰：诣兖国公神位前。至位，曰：东向立。酌献如上仪。曰：诣邹国公神位前。至位，曰：西向立。酌献如上仪。乐止，曰：退，复位。及阶，曰：降阶。至位，曰就位，西向立。

明赞唱曰：终献官行礼，引赞者进前曰：请诣盥洗位。至位，曰：北向立。搢笏，盥手、帨手，出笏。请诣爵洗位，至位，曰：北向立。搢笏，执爵、涤爵、拭爵，以爵授执事者，如是者三，出笏。请诣酒尊所，至阶，曰：升阶。至酒尊所，曰：西向立。搢笏，执爵举幕，司尊者酌象尊之醴齐，以爵授执事者，如是者三，出笏。曰：诣大成至圣文宣王神位前。至位曰：就位，北向立，稍前。酌献之乐作。搢笏跪，三上香，执爵三祭酒，奠爵，出笏，就拜兴，平身少退，鞠躬，拜兴，拜

兴，平身。曰：诣充国公神位前。至位，曰：东向立，酌献如上仪。曰：诣邹国公神位前。至位，曰：西向立；酌献如上仪。乐止，曰：退复位。及阶，曰：降阶；至位，曰：就位，西向立。

俟终献将升阶，明赞唱曰：分献官行礼。引赞者分引东从祀分献官进前曰：诣盥洗位。至位，曰：北向立。搢笏，盥手、帨手，出笏，诣爵洗位，至位曰：北向立。搢笏，执爵、涤爵、拭爵，以爵授执事者，出笏，诣酒尊所。至阶，曰：升阶；至酒尊所，曰：西向立。搢笏，执爵举幕，司尊者酌象尊之醴齐，以爵授执事者，出笏，诣东从祀神位前。至位，曰：就位，东向立，稍前。搢笏跪，三上香，执爵三祭酒，奠爵，出笏，就拜兴，平身少退，鞠躬，拜兴，拜兴，平身，退复位。及阶，曰：降阶；至位，曰：就位，西向立。

引西从祀分献官同上仪，唯至神位前东向立。俟十哲分献官离位，明赞唱曰：两庑分奠官行礼。引赞者进前曰：诣盥位，至位，曰：南向立。搢笏，盥手，帨手，出笏，诣爵洗位。至位，曰：南向立。搢笏，执爵、涤爵、拭爵，以爵授执事者，出笏。曰：诣东庑酒尊所。及阶，曰：升阶，至酒尊所，曰：北向立。搢笏，执爵举幕，酌象尊之醴齐，以爵授执事者，出笏，诣东庑神位前。至位，曰：东向立，稍前。搢笏跪，三上香，执爵三祭酒，奠爵，出笏，就拜兴，平身稍退，鞠躬，拜兴，拜兴，平身，退复位。至阶，曰：降阶，至位，曰：就位，西向立。

引西庑分奠官同上仪，唯至神位前，东向立作西向立。俟终献十哲，两庑分奠官同时复位。明赞唱曰：礼饌者彻笾豆。彻豆之乐作，礼饌者跪，移先圣前笾豆，略离席，乐止。明赞唱曰：诸执事者退复位。俟诸执事者至版位立定，送神之乐作。明赞唱曰：初献官以下皆再拜，承传赞曰：鞠躬，拜，兴，拜，兴，平身。乐止。明赞唱曰：祝人取祝，币人取币，诣瘗坎。俟彻祝币者出殿门，北向立。望瘗之乐作。明赞唱曰：三献官诣望瘗位，引赞者进前曰：请诣望瘗位。至位，曰：就位北向立，曰：可瘗。埋毕，曰：退，复位。至殿庭前，候乐止，明赞唱曰：典乐官以乐工出就位，明赞唱曰：阖户。又唱曰：初献官以下退诣圆揖位，引赞者引献官退诣圆揖位。至位，初献在西，亚

终献及分献已下在东，陪位官东班在东，西班在西。俟立定，明赞唱曰：圆揖。礼毕，退复位，引赞者各引献官诣幕次更衣。

其饮福受胙，除国学外，诸处仍依常制。

阙里之庙，始自太宗九年，令先圣五十一代孙袭封衍圣公元措修之，官给其费。而代祠之礼，则始于武宗。牲用太牢，礼物别给白金一百五十两，彩币表里各十有三匹。四年冬，复遣祭酒刘赓往祀，牲礼如旧。延佑之末，泰定、天历初载，皆循是典，锦币杂彩有加焉。

岳镇海渎代祀，自中统二年始。凡十有九处，分五道。后乃以东岳、东海、东镇、北镇为东道，中岳、淮渎、济渎、北海、南岳、南海、南镇为南道，北岳、西岳、后土、河渎、中镇、西海、西镇、江渎为西道。既而，又以驿骑迂远，复为五道，道遣使二人，集贤院奏遣汉官，翰林院奏遣蒙古官，出玺书给驿以行。中统初，遣道士，或副以汉官。至元二十八年正月，帝谓中书省臣言曰：“五岳四渎祠事，朕宜亲往，道远不可。大臣如卿等又有国务，宜遣重臣代朕祠之，汉人选名儒及道士习祀事者。”

其礼物，则每处岁祀银香合一重二十五两，五岳组金幡二、钞五百贯，四渎织金幡二、钞二百五十贯，四海、五镇销金幡二、钞二百五十贯，至则守臣奉诏使行礼。皇帝登宝位，遣官致祭，降香幡合如前礼，惟各加银五十两，五岳各中统钞五百贯，四渎、四海、五镇各中统钞二百五十贯。或他有祷，礼亦如之。

其封号，至元二十八年春二月，加上东岳为天齐大生仁圣帝，南岳司天大化昭圣帝，西岳金天大利顺圣帝，北岳安天大贞玄圣帝，中岳中天大宁崇圣帝。加封江渎为广源顺济王，河渎灵源弘济王，淮渎长源溥济王，济渎清源善济王，东海广德灵会王，南海广利灵孚王，西海广润灵通王，北海广泽灵佑王。成宗大德二年二月，加封东镇沂山为元德东安王，南镇会稽山为昭德顺应王，西镇吴山为成德永靖王，北镇医巫闾山为贞德广宁王，中镇霍山为崇德应灵